

OFICINA REGISTRO XERAL-CONCELLO DE CABANAS
Entrada
Nº. 20170000000265 13/02/2017 09:37:11



Bloque Nacionalista Galego de Cabanas
cabanas@bng.gal
cabanas.bng.gal

Iago Varela Martínez, voceiro municipal do Bloque Nacionalista Galego, presenta ante o Pleno do Concello de Cabanas para o seu debate e posterior acordo a seguinte

PROPOSTA SOBRE A PRAGA DA COUZA GUATEMALTECA

EXPOSICIÓN DE MOTIVOS

O pasado día 6 de febreiro publicouse no DOG unha resolución da Dirección Xeral de Gandaría, Agricultura e Industrias Agroalimentarias, pola cal se ampliaron os concellos afectados (“zona demarcada”) pola presenza da praga coñecida como Couza Guatemalteca (*Tecia Solanivora*) e impondo as medidas xa establecidas nunha resolución anterior do 16 de outubro de 2015, da mesma Dirección Xeral.

De acordo con esta Resolución do 16 de outubro de 2015, nos concellos afectados, un total de 31 incluíndo o noso, establécense unha serie de medidas e restricións no cultivo, almacenamento e comercialización da pataca, e prohibése o movemento da mesma fóra da zona demarcada.

Porén, agárdase que o Ministerio de Agricultura, Pesca, Alimentación e Medioambiente publique un Decreto que, entre outras medidas, previsibelmente incluíra a prohibición total do cultivo da pataca na zona afectada, con medidas sancionadoras para quen a incumpra.

Actualmente, as persoas produtoras están sufrindo unha importante incerteza, pois descoñecen tanto os efectos do Decreto do Ministerio, como a súa data de publicación e posta en efecto, a duración das medidas (previsibelmente dous anos), e se se permitirá unha moratoria neste primeiro ano coas explotacións que xa sementaron ou xa compraron patacas para sementar, ou, pola contra, ordenarase a destrución do sementado, cos seguintes prexuízos económicos.

As medidas promovidas están a ser tomadas sen ter en consideración ás produtoras das zonas afectadas, e sen procurar o establecemento de ningún tipo de medidas paliativas por parte da administración.

Se ben ningún dos concellos afectados forma parte das zonas grandes produtoras de pataca no país, a prohibición deste cultivo provocará importantes prexuízos económicos, tanto ás plantacións comerciais que verán imposibilitado o seu traballo, como ás



Bloque Nacionalista Galego de Cabanas
cabanas@bng.gal
cabanas.bng.gal


propietarias de pequenas plantacións de autoconsumo, para as cales o cultivo da pataca permite un importante aforro económico (nalgúns casos esencial) que agora desaparecerá.

Por estas razóns, o Bloque Nacionalista Galego somete a debate e aprobación polo pleno do Concello de Cabanas esta proposta propoñendo a adopción dos seguintes

ACORDOS

1. Instar ao Ministerio de Agricultura, Pesca, Alimentación e Medioambiente a publicar o Decreto de medidas contra a Couza Guatemalteca á maior brevidade, e, de ser tomada a decisión de prohibir o cultivo de pataca nos concellos afectados, clarificar a extensión, duración e características da mesma, de cara a procurar no posíbel a redución dos prexuízos ás persoas propietarias.
2. Instar á Consellería de Medio Rural e ao Ministerio de Agricultura, Pesca, Alimentación e Medioambiente a establecer, de acordo coa legislación vixente (RD 1190/1998, Lei 43/2002, entre outras) liñas de axudas e de compensación dos prexuízos económicos para as persoas propietarias afectadas, incluíndo tanto explotacións comerciais como cultivos de autoconsumo, e procurar que a xestión destas axudas sexa axilizada o máis posíbel.
3. Realizar desde o Concello de Cabanas unha campaña informativa, na que se difundan tanto as restricións actualmente existentes como a posible prohibición de cultivo (de se producir esta), para evitar que as persoas produtoras do noso concello poidan ser sancionadas, e na que se asesore de cara á solicitude de posíbeis axudas, no caso de que estas finalmente se estableceren.
4. Realizar desde os Servizos Sociais do Concello de Cabanas unha investigación de oficio para detectar persoas ás que a prohibición do cultivo de autoconsumo de pataca puiden deixar nunha situación de emerxencia, e tomar medidas de cara á corrección urxente desta situación, de se producir, sen agardar polas posíbeis axudas establecidas en instancias superiores.

En Cabanas, a 13 de febreiro de 2017


Asdo. Iago Varela Martínez

Concelleiro do Bloque Nacionalista Galego
SR. ALCALDE – PRESIDENTE DO CONCELLO DE CABANAS